

Sarajevo, 19. decembar 2011

## NAUČNI SKUP

### **“POLITIČKI I VOJNI ZNAČAJ ODBRANE SARAJEVA 1992. - 1995. GODINE”**

U Sarajevu je novembra 2005. organiziran okrugli sto na temu “OPSADA I ODBRANA SARAJEVA 1992-1995. GODINE“. Tada su kritički analizirani različiti aspekti herojske odbrane Sarajeva: međunarodno-pravni, politički, vojni, historijski, kulturni i civilizacijski značaj odbrane, zatim opsada Sarajeva, uključujući zločin protiv čovječnosti i međunarodnog prava.

Iako su rezultati tog naučnog savjetovanja objavljeni u posebnoj ediciji Instituta za istraživanje zločina protiv čovječnosti i međunarodnog prava Univerziteta u Sarajevu (2008. godine), ipak istina o odbrani Sarajeva još uvijek nije potpuno i cjelovito naučno istražena. Nažalost, i šestnaest godina poslije Dejtonskog, odnosno Pariškog mirovnog sporazuma (14. decembar 1995.), veoma ofanzivno i svim propagandnim sredstvima se plasiraju i naturaju falsifikati, neke “nove istine”, minimizira se sam odbrambeni karakter borbe koju je vodila Armija Republike Bosne i Hercegovine i drugi antifašisti, negira se i sam zločin genocida nad Bošnjacima u Republici Bosni i Hercegovini, uključujući i na području Sarajeva. Po velikosrpskim falsifikatima i propagandi Bošnjaci su sami sebe i druge (Srbe, Hrvate i ostale) ubijali, masakrirali i granatirali (Markale, Pivara, Dobrinja, Pofalići, Žuč i svi dijelovi Sarajeva u opsadi). Događaji u Dobrovoljačkoj ulici od maja 1992, te posebno masakri u Miskinovoj i na tržnici Markale se nastoje bezočno politički instrumentalizirati i staviti u funkciju aktuelne politike, pri čemu se plasiraju laži kako su granate na sopstveno stanovništvo ispaljivane od Armije Republike Bosne i Hercegovine, da bi se pridobila međunarodna podrška i pomoć, odnosno vojna intervencija Zapada. Pri tome se bezočno prikrivaju i zaobilaze notorne činjenice: u Sarajevu je, prema istraživanjima ICTY-a, ubijeno i umrlo 18.889 civila (ljudi, bez obzira na naciju, vjeru, spol ili životnu dob), od čega samo 1.600 djece; zanemaruje se činjenica da je u modernoj historiji Sarajevo bilo u opsadi 1.479 dana (duže od opsade i vandalskog granatiranja Lenjingrada u Drugom svjetskom ratu) i da je

tri i po godine bilo izloženo stravičnom razaranju i stvaranju nepodnošljivih elementarnih uslova života, u kojima nije bilo hrane, struje, vode, plina i svega drugoga što je neophodno za normalno življenje i opstanak.

Uprkos svemu, Sarajevo je herojski odbranjeno i zadržalo multinacionalni, multireligijski i civilizacijski karakter.

Iz svih navedenih, prije svega naučnih razloga, Vlada Kantona Sarajevo (Ministarstvo za boračka pitanja) i Institut za istraživanje zločina protiv čovječnosti i međunarodnog prava Univerziteta u Sarajevu su odlučili organizovati međunarodni naučni skup na temu:

### **“POLITIČKI I VOJNI ZNAČAJ ODBRANE SARAJEVA 1992-1995. GODINE”**

Cilj naučnog skupa je da naučno, cjelovito i svestrano, polazeći od multidisciplinarnog pristupa predmetu istraživanja, prouči, naučno istraži i dođe do valjanog naučnog saznanja o političkom i vojnom značaju odbrane Sarajeva 1992.-1995. godine.

Organizacija međunarodnog naučnog skupa na navedenu temu nesumnjivo će dati doprinos razvoju relevantnih saznanja od značaja za nauku, politiku i društvenu praksu.

Polazeći od navedenih očekivanja i artikulisanog cilja skupa, njegove uloge i bitnih funkcija, sugeriramo listu orijentacionih, potencijalnih i mogućih naslova tema referata. Ipak, mogući su i drugačiji i novi naslovi koji se neposredno odnose na činioce sadržaja predmeta istraživanja i pojedine aspekte predmeta naučnog istraživanja.

Mogući, orijentaciono-radni naslovi tema:

- opsada Sarajeva u kontekstu historijskih iskustava;
- Sarajevo kao strateški cilj agresije na Republiku Bosnu i Hercegovinu;
- država Bosna i Hercegovina i njen glavni grad Sarajevo u predratnoj koncepciji reorganizacije formiranjem vojnih oblasti;
- efektivni za opsadu Sarajeva;
- faze agresorske opsade Sarajeva;
- efektivni odbrane Sarajeva (političko-sociološka analiza 1. korpusa Armije Republike Bosne i Hercegovine);
- usporedni pokazatelji o efektivima za opsadu i efektivima za obranu Sarajeva;
- Sarajevo 2. i 3. maja 1992. u svijetlu historijskih izvora;
- implikacije pravnog položaja i mogućnosti djelovanja snaga JNA na teritoriji Bosne i Hercegovine nakon međunarodnog priznanja državne nezavisnosti;

- politički i vojni značaj odbrane Sarajeva;
- vojno-političko organizovanje, vrijednosni stavovi i društveno-politička orijentacija ljudskog faktora u odbrani Sarajeva;
- opće karakteristike i pokazatelji o borbenim dejstvima u zoni 1. korpusa Armije RBiH od 1992.-1995;
- rješavanje problema snadbijevanja Armije Republike Bosne i Hercegovine i stanovništva u okruženom Sarajevu;
- moralni aspekti stanja u 1. korpusu Armije Republike Bosne i Hercegovine;
- genocid i drugi oblici zločina protiv čovječnosti i međunarodnog prava na području Sarajeva u opsadi;
- embargo - izraz nepravedne politike prema Bosni i Hercegovini;
- odgovornost međunarodne zajednice;
- posjete visokih zvaničnika međunarodne zajednice Bosni i Hercegovini;
- post festum: interpretativne manipulacije historijskih događaja u Sarajevu 2. i 3. maja 1992. (ideološki, politički i pravni aspekti).

Naslov teme treba dostaviti organizatorima do 20. januara 2012. Ukoliko Organizacioni odbor, na čelu sa Prof. dr. Nijazom Durakovićem, prihvati temu, sa mogućnošću eventualnih sugestija, učesnici skupa trebaju najkasnije do 10. februara dostaviti sažetak rada, a referat do 20. februara 2012, na e-mail, poštom ili lično u Institut za istraživanje zločina protiv čovječnosti i međunarodnog prava Univerziteta u Sarajevu, Halida Nazečića 4.

Maksimalna dužina referata može biti dva autorska tabaka (32 stranice fonta A-4 sa proredom 1,5 i fontom slova 12), s tim što će vrijeme prezentiranja rezultata istraživanja trajati do deset minuta.

Putne troškove za učesnike skupa koji dolaze iz inostranstva snosiće organizatori.

Međunarodni naučni skup "POLITIČKI I VOJNI ZNAČAJ ODBRANE SARAJEVA 1992. - 1995. GODINE" biće održan u Sarajevu **29. februara 2012**, dakle simbolički izabran datum: uoči dana nezavisnosti suverene i međunarodno priznate Republike Bosne i Hercegovine.

O svim ostalim detaljima bićete pravovremeno obaviješteni.

Očekujemo da ćete biti učesnik ovog skupa i da ćete na taj način dati naučni doprinos naučnog razmatranja, kritičkog promišljanja i obrade ove veoma naučno i društveno složene teme.

Očekujemo da ćete biti učesnik ovog skupa i da ćete na taj način dati naučni doprinos naučnog razmatranja, kritičkog promišljanja i obrade ove veoma naučno i društveno složene teme.

VLADA KANTONA SARAJEVO

Ministarstvo za boračka pitanja

Doc. dr. Nedžad Ajnadžić, ministar

UNIVEZITET U SARAJEVU

Institut za istraživanje zločina protiv  
čovječnosti i međunarodnog prava

Prof. dr. Smail Čekić, direktor